

Driek hef biewerking'n

'Foi Driek, wat loop ie tog te hoest'n', zeg mien vrouwe van de wèke teeg'n mie. 'En a'k ut zo heure bi-j ok wat kot van oadem. Afijn, um un lang verhaal kot te maak'n, mien vrouwe von da'k noar de huusarts mosse. Ik konne dee-j zelfde middag nog bie de dokter teregte. Hand'n e-wass'n, rooje zadoak veur de neuze en de mont en doar ging ik effen loater op weg noar ome dokter. Nou, de huusarts was d'r vlot met: Driek, ik hep sleg niejs, ie hept Corona. Ik denke: verdikkeme, hoe he'k dat noe tog e-kreeg'n? 'Moar' zeg de dokter teeg'n mie, ik binne nog op zuuk noar un vrieuilluger dee-j as eersten un mediesien teeg'n Corona wil test'n. Ie bint gezond, ie bint nog jong genug en ie kunt de weereld help'n met oe doad. Wat? Ie kunt weereldberoemd word'n umda-j de eersten bint. 't Is moar un klein spuitjen. A-j nit wilt meewerk'n mo-j tien daag'n zonder vrouwe op oe sloapkaam'er bliev'n en krie-j allenig moar pannekoak'n, want dat is ut enige wat oe vrouwe onder de deure kan deurskoev'n. Dus ik zegge: 'dus a'k dat mediesien nemme, mag ik gewonig vrie rondloop'n? Dan jas mie die spuite d'r mar in. En zo ging ik bie de huusarts weg met un possie jajem in mien linkerarm. Eff'n laat'r vertel ik mien vrouwe ut heele verhaal en dat ik, Driek van de Oerdiek, de weereld goa redd'n as proefkenien met un mediesien uut un spuitjen. Mien vrouwe haalt de skolders op en zeg: 'Noe ku-j weh denk'n dat ie de eenuggen bint, moar onze buurvrouwe van hiernoast dee-j verteld'n mie un wèke of twee geleej'n in ut geheim – ik mog ut nit vedder vetell'n – det zee-j ok klagte'n had e-had en ok de weereld ging redd'n deur as eerste un medisien te nemm'n. Ik hep heur sinsdien nit meer e-spraak'n, dus ik nem an dat ut goet met heur geet. Afijn, met ut medisien in mien arm kon mie niks meer oaverkomm'n dus ik loope fluitend noar buut'n. En wat wil ut toeval? De buurvrouwe stapt ok net noar buut'n. Dus ik zegge teeg'n heur: 'ik komme net van de huusarts af en ik hebbe un mediesien teeg'n corona e-kreeg'n en noe heurd'n ik net van mien vrouwe dat ie det ok e-had hept. Mag ik vraag'n: heb ie nog last van biewerking'n e-had? Ze kik mie glaazug an, zet heur hand'n in heur oksels, röp heel hard 'tòòòk, tòòòk, tòòòk, trekt de bokse van de kont, skut un paar keer met heur agterwerk en legt un ei...

Ondanks alles wens ik juule mooie Kerstdaag'n en un goeje joarwisseling toe. Wie sprèkt mekare volgend joar weer!

Driek van de Oerdiek